



縮刻唐石經尚書

上

936  
3





# 尚書序

古者伏羲氏之王天下也始畫八卦造書契以代  
結繩之政由是文籍生焉伏羲神農黃帝之書  
謂之三墳言大道也少昊顓頊高辛唐虞之書  
謂之五典言常道也至于夏商周之書雖設教不  
倫雅誥奧義其歸一揆是故歷代寶之以為大訓  
八卦之說謂之八索求其義也九州之志謂之九丘



丘聚也言九州所有土地所生風氣所宜皆聚此書也春秋左氏傳曰楚左史倚相能讀三墳五典八索九丘即謂上世帝王遺書也先君孔子生於周末覩史籍之煩文懼覽之者不一遂乃定禮樂明舊章刪詩為三百篇約史記而修春秋讚易道以黜八索述職方以除九丘討論墳典斷自唐虞以下訖于周芟夷煩亂翦截浮辭舉其宏綱撮其機要足以垂世立教典謨訓誥誓命之文凡百

篇所以恢弘至道示人主以軌範也帝王之制坦然明白可舉而行三千之徒並受其義及秦始皇滅先代典籍焚書坑儒天下學士逃難解散我先人用藏其家書于屋壁漢室龍興開設學校旁求儒雅以闡大猷濟南伏生年過九十失其本經口以傳授裁廿餘篇以其上古之書謂之尚書百篇之義世莫得聞至魯共王好治宮室壞孔子舊宅以廣其居於壁中得先人所藏古文虞夏商周

尚書卷一  
之書及傳論語孝經皆科斗文字王又升孔子堂  
聞金石絲竹之音乃不壞宅悉以書還孔氏科斗  
書廢已久時人無能知者以所聞伏生之書考論  
文義定其可知者為隸古定更以竹簡寫之增多  
伏生廿五篇伏生又以舜典合於堯典益稷合於  
臯陶謨盤庚三篇合為一康王之誥合於顧命復  
出此篇并序凡五十九篇為四十六卷其餘錯亂  
靡滅弗可復知悉上送官藏之書府以待能者承

詔為五十九篇作傳於是遂研精覃思博考經籍  
採摭羣言以立訓傳約文申義敷暢厥旨庶幾有  
補於將來書序序所以為作者之意昭然義見宜  
相附近故引之各冠其篇首定五十八篇既畢會  
國有巫蠱事經籍道息用不復以聞傳之子孫以  
貽後代若好古博雅君子與我同志亦所不隱也  
堯典第一

虞書

孔氏傳

昔在帝堯聰明文思光宅天下將遜于位讓于虞  
舜作堯典 堯典

曰若稽古帝堯曰放勳欽明文思安安允恭克讓  
光被四表格于上下克明俊德以親九族九族既  
睦平章百姓百姓昭明協和萬邦黎民於變時雍  
乃命羲和欽若昊天曆象日月星辰敬授人時分  
命羲仲宅嵎夷曰暘谷寅賓出日平秩東作日中  
星鳥以殷仲春厥民析鳥獸孳尾申命羲叔宅南

交平秩南訛敬致日永星火以正仲夏厥民因鳥  
獸希革分命和仲宅西曰昧谷寅饒納日平秩西  
成宵中星虛以殷仲秋厥民夷鳥獸毛毨申命和  
叔宅朔方曰幽都平在朔易日短星昴以正仲冬  
厥民隩鳥獸氄毛帝曰咨汝羲暨和晷三百有六  
旬有六日以閏月定四時成歲允釐百工庶績咸  
熙帝曰疇咨若時登庸放齊曰胤子朱啓明帝曰  
吁嚚訟可乎帝曰疇咨若予采驩兜曰都共工方

尚書卷一  
四  
鳩倂功帝曰吁靜言庸違象恭滔天帝曰咨四岳  
湯湯洪水方割蕩蕩懷山襄陵浩浩滔天下民其  
咨有能俾乂僉曰於鯀哉帝曰吁咈哉方命圮族  
岳曰異哉試可乃已帝曰往欽哉九載績用弗成  
帝曰咨四岳朕在位七十載汝能庸命異朕位岳  
曰否德忝帝位曰明明揚側陋師錫帝曰有鰥在  
下曰虞舜帝曰俞予聞如何岳曰瞽子父頑母嚚  
象傲克諧以孝烝烝乂不格女帝曰我其試哉女

于時觀厥刑于二女救厘降二女于媯汭嬪于虞帝  
曰欽哉

舜典第二

虞書

孔氏傳

虞舜側微堯聞之聰明將使嗣位歷試諸難作  
舜典 舜典

曰若稽古帝舜曰重華協于帝濬哲文明溫恭允  
塞玄德外聞乃命以位慎徽五典五典克從納于

百揆百揆時敘賓于四門四門穆穆納于大麓烈  
風雷雨弗迷帝曰格汝舜詢事考言乃言底可績  
三載汝陟帝位舜讓于德弗嗣正月上日受終于  
文祖在璿璣玉衡以齊七政肆類于上帝禋于六  
宗望于山川徧于羣神輯五瑞既月乃日覲四岳  
羣牧班瑞于羣后歲二月東巡守至于岱宗柴望  
秩于山川肆覲東后協時月正日同律度量衡修  
五禮五玉三帛二生一死贄如五噐卒乃復五月

南巡守至于南岳如岱禮八月西巡守至于西岳  
如初十有一月朔巡守至于北岳如西禮歸格于  
藝祖用特五載一巡守羣后四朝敷奏以言明試  
以功車服以庸肇十有二州封十有二山濬川象  
以典刑流宥五刑鞭作官刑扑作教刑金作贖刑  
眚災肆赦怙終賊刑欽哉欽哉惟刑之恤哉流共  
工于幽洲放驩兜于崇山竄三苗于三危殛鯀于  
羽山四罪而天下咸服廿有八載帝乃殂落百姓

如喪考妣三載四海遏密八音月正元日舜格于  
文祖詢于四岳闢四門明目達四聰咨十有二  
牧曰食哉惟時柔遠能邇惇德允元而難任人蠻  
夷率服舜曰咨四岳有能奮庸熙帝之載使宅百  
揆堯采惠疇僉曰伯禹作司空帝曰俞咨禹汝平  
水土惟時懋哉禹拜稽首讓于稷契暨皋陶帝曰  
俞汝往哉帝曰弃黎民阻飢汝后稷播時百穀帝  
曰契百姓不親五品不遜汝作司徒敬敷五教在

寬帝曰皋陶蠻夷猾夏寇賊姦宄汝作士五刑有  
服五服三就五流有宅五宅三居惟明克允帝曰  
疇若予工僉曰垂哉帝曰俞咨垂汝共工垂拜稽  
首讓于及斨暨伯與帝曰俞往哉汝諧帝曰疇若  
予上下草木鳥獸僉曰益哉帝曰俞咨益汝作朕  
虞益拜稽首讓于朱虎熊羆帝曰俞往哉汝諧帝  
曰咨四岳有能典朕三禮僉曰伯夷帝曰俞咨伯  
汝作秩宗夙夜惟寅直哉惟清伯拜稽首讓于夔



尚書卷第一  
龍帝拜曰俞往欽哉帝曰夔命汝典樂教胄子直而  
溫寬而栗剛而無虐簡而無傲詩言志歌永言聲  
依永律和聲八音克諧無相奪倫神人以和夔曰  
於予擊石拊石百獸率舞帝曰龍朕即聖讒說殄行  
震驚朕師命汝作納言夙夜出納朕命惟允帝曰  
咨汝卅有二人欽哉惟時亮天功三載考績三考  
黜陟幽明庶績咸熙分北三苗舜生卅徵庸卅在  
位五十載陟方乃死帝救厘下土方設居方別生分

類作汨作九共九篇稟飲

尚書卷第一

# 尚書卷第二

大禹謨第三

虞書

孔氏傳

臯陶矢厥謨禹成厥功帝舜申之作大禹臯陶謨  
益稷 大禹謨

曰若稽古大禹曰文命敷于四海祗承于帝曰后  
克艱厥后臣克艱厥臣政乃乂黎民敏德帝曰俞

允若茲嘉言罔攸伏野無遺賢萬邦咸寧稽于衆  
舍己從人不虐無告不廢困窮惟帝時克益曰都  
帝德廣運乃聖乃神乃武乃文皇天眷命奄有四  
海爲天下君禹曰惠迪吉從逆凶惟影響益曰吁  
戒哉儆戒無虞罔失法度罔遊于逸罔淫于樂任  
賢勿貳去邪勿疑疑謀勿成百志惟熙罔違道以  
干百姓之譽罔拂百姓以從己之欲無怠無荒四  
夷來王禹曰於帝念哉德惟善政政在養民水火

金木土穀惟修正德利用厚生惟和九功惟敘九  
敘惟歌戒之用休董之用威勸之以九歌俾勿壞  
帝曰俞地平天成六府三事允治萬世永賴時乃  
功帝曰格汝禹朕宅帝位卅有三載耄期倦于勤  
汝惟不怠摠朕師禹曰朕德罔克民不依臯陶邁  
種德德乃降黎民懷之帝念哉念茲在茲釋茲在  
茲名言茲在茲允出茲在茲惟帝念功帝曰臯陶  
惟茲臣庶罔或干予正汝作士明于五刑以弼五

尚書卷二  
二  
教期于予治刑期于無刑民協于中時乃功懋哉  
皐陶曰帝德罔愆臨下以簡御衆以寬罰弗及嗣  
賞延于世宥過無大刑故無小罪疑惟輕功疑惟  
重與其殺不辜寧失不經好生之德洽于民心茲  
用不犯于有司帝曰俾予從欲以治四方風動惟  
乃之休帝曰來禹降水做予成允成功惟汝賢克  
勤于邦克儉于家不自滿假惟汝賢汝惟不矜天  
下莫與汝爭能汝惟不伐天下莫與汝爭功予懋

乃德嘉乃丕績天之曆數在汝躬汝終陟元后人  
心惟危道心惟微惟精惟一允執厥中無稽之言  
勿聽弗詢之謀勿庸可愛非君可畏非民衆非元  
后何戴后非衆罔與守邦欽哉慎乃有位敬修其  
可願四海困窮天祿永終惟口出好興戎朕言不  
再禹曰枚卜功臣惟吉之從帝曰禹官占惟先蔽  
志昆命于元龜朕志先定詢謀僉同鬼神其依龜  
筮協從卜不習吉禹拜稽首固辭帝曰毋惟汝諧

正月朔旦受命于神宗率百官若帝之初帝曰咨  
禹惟時有苗弗率汝徂征禹乃會羣后誓于師曰  
濟濟有衆咸聽朕命蠢茲有苗昏迷不恭侮慢自  
賢反道敗德君子在野小人在位民弃不保天降  
之咎肆予以爾衆士奉辭伐罪爾尚一乃心力其  
克有勲三旬苗民逆命益贊于禹曰惟德動天無  
遠弗届滿招損謙受益時乃天道帝初于歷山往  
于田日號泣于旻天于父母負罪引慝祗載見瞽

瞽夔夔齊慄瞽亦允若至誠感神矧茲有苗禹拜  
昌言曰俞班師振旅帝乃誕敷文德舞干羽于兩  
階七旬有苗格

皋陶謨第四

虞書

孔氏傳

皋陶謨

曰若稽古皋陶曰允迪厥德謨明弼諧禹曰俞如  
何皋陶曰都慎厥身修思永惇敘九族庶明勵翼

尚書卷二  
四  
邇可遠在茲禹拜昌言曰兪臯陶曰都在知人在  
安民禹曰吁咸若時惟帝其難之知人則哲能官  
人安民則惠黎民懷之能哲而惠何憂乎驩兜何  
遷乎有苗何畏乎巧言令色孔壬臯陶曰都亦行  
有九德亦言其有德乃言曰載采采禹曰何臯陶  
曰寬而栗柔而立愿而恭亂而敬擾而毅直而溫  
簡而廉剛而塞彊而義彰厥有常吉哉日宣三德  
夙夜浚明有家日嚴祇敬六德亮采有邦翕受敷

施九德咸事俊乂在官百僚師師百工惟時撫于  
五辰庶績其凝無教逸欲有邦兢兢業業一日二  
日萬幾無曠庶官天工人其代之天敘有典勅我  
五典五惇哉天秩有禮自我五禮有庸哉同寅協  
恭和衷哉天命有德五服五章哉天討有罪五刑  
五用哉政事懋哉懋哉天聰自我民聰明天明  
畏自我民明威達于上下敬哉有土臯陶曰朕言  
惠可底行禹曰兪乃言底可績臯陶曰予未有知

思曰贊贊襄哉

益稷第五

虞書

孔氏傳

益稷

帝曰來禹汝亦昌言禹拜曰都帝予何言予思曰  
孜孜臯陶曰吁如何禹曰洪水滔天浩浩懷山襄  
陵下民昏墊予乘四載隨山刊木暨益奏庶鮮食  
予決九川距四海濬畎澮距川暨稷播奏庶艱食

鮮食懋遷有無化居烝民乃粒萬邦作乂臯陶曰  
兪師汝昌言禹曰都帝慎乃在位帝曰兪禹曰安  
汝止惟幾惟康其弼直惟動丕應後志以昭受上  
帝天其申命用休帝曰吁臣哉鄰哉鄰哉臣哉禹  
曰兪帝曰臣作朕股肱耳目予欲左右有民汝翼  
予欲宣力四方汝爲予欲觀古人之象日月星辰  
山龍華蟲作會宗彝藻火粉米黼黻絺繡以五采  
彰施于五色作服汝明予欲聞六律五聲八音在

治忽以出納五言汝聽予違汝弼汝無面從退有  
後言欽四鄰庶頑讒說若不在時候以明之撻以  
記之書用識哉欲並生哉工以納言時而賜之格  
則承之庸之否則威之禹曰俞哉帝光天之下至  
于海隅蒼生萬邦黎獻共惟帝臣惟帝時舉敷納  
以言明庶以功車服以庸誰敢不讓敢不敬應帝  
不時敷同日奏罔功無若丹朱傲惟慢遊是好傲  
虐是作罔晝夜頌頌罔水行舟朋淫于家用殄厥

世予創若時娶于塗山辛壬癸甲啓呱呱而泣予  
弗子惟荒度土功弼成五服至于五千州十有二  
師外薄四海咸建五長各迪有功苗頑弗即工帝  
其念哉帝曰迪朕德時乃功惟敘皋陶方祗厥敘  
方施象刑惟明夔曰夏擊鳴球搏拊琴瑟以詠祖  
考來格虞賓在位羣后德讓下管鼗鼓合止祝啟  
笙鏞以間鳥獸跄跄簫韶九成鳳皇來儀夔曰於  
予擊石拊石百獸率舞庶尹允諧帝庸作歌曰勅



天之命惟時惟幾乃歌曰股肱喜哉元首起哉百  
工熙哉臯陶拜手稽首颺言曰念哉率作興事慎  
乃憲欽哉屢省乃成欽哉乃賡載歌曰元首明哉  
股肱良哉庶事康哉又歌曰元首叢脞哉股肱惰  
哉萬事墮哉帝曰俞往欽哉

尚書卷第二

尚書卷第三

禹貢第一

夏書

孔氏傳

禹別九州隨山濬川任土作貢 禹貢

禹敷土隨山刊木奠高山大川

冀州既載壺口治梁及岐既修大原至于岳陽覃  
懷底績至于衡漳厥土惟白壤厥賦惟上上錯厥

田惟中中恒衛既從大陸既作島夷皮服夾右碣石入于河

濟河惟兗州九河既道雷夏既澤灘沮會同桑土既蠶是降丘宅土厥土黑墳厥草惟繇厥木惟條厥田惟中下厥賦貞作十有三載乃同厥貢漆絲厥篚織文浮于濟漂達于河

海岱惟青州嶠夷既略維淄其道厥土白墳海濱廣斥厥田惟上下厥賦中上厥貢鹽絺海物惟錯

岱畎絲枲鈆松怪石萊夷作牧厥篚檠絲浮于汶達于濟

海岱及淮惟徐州淮沂其乂蒙羽其藝大野既豬東原底平厥土赤埴墳草木漸包厥田惟上中厥賦中中厥貢惟土五色羽畎夏翟嶧陽孤桐泗濱浮磬淮夷蠙珠暨魚厥篚玄纈縞浮于淮泗達于河

淮海惟揚州彭蠡既豬陽鳥攸居三江既入震澤

底定篠簜既敷厥草惟夭厥木惟喬厥土惟塗泥  
厥田惟下下厥賦下上上錯厥貢惟金三品璠琨  
篠簜齒革羽毛惟木島夷卉服厥篚織貝厥包橘  
柚錫貢汭于江海達于淮泗

荆及衡陽惟荊州江漢朝宗于海九江孔殷沱潛  
既道雲土夢作乂厥土惟塗泥厥田惟下中厥賦  
上下厥貢羽毛齒革惟金三品柶斝栝柏礪砥砮  
丹惟箇篚楛三邦底貢厥名包匭菁茅厥篚玄纁

璣組九江納錫大龜浮于江沱潛漢逾于洛至于  
南河

荆河惟豫州伊洛瀍澗既入于河滎波既豬導荷  
澤被孟豬厥土惟壤下土墳壚厥田惟中上厥賦  
錯上中厥貢漆枲絺紵厥篚織纊錫貢磬錯浮于  
洛達于河

華陽黑水惟梁州岷嶓既藝沱潛既道蔡蒙旅平  
和夷底績厥土青黎厥田惟下上厥賦下中三錯

厥貢璆鐵銀鏤砮磬熊羆狐狸織皮西傾因桓是  
來浮于潛逾于沔入于渭亂于河  
黑水西河惟雍州弱水既西涇屬渭汭漆沮既從  
澧水攸同荆岐既旅終南博物至于鳥鼠原隰底  
績至于豬野三危既宅三苗丕敘厥土惟黃壤厥  
田惟上上厥賦中下厥貢惟球琳琅玕浮于積石  
至于龍門西河會于渭汭織皮崑崙析支渠搜西  
戎即敘導岍及岐至于荆山逾于河壺口雷首至

于太岳底柱析城至于王屋太行恒山至于碣石  
入于海西傾朱圉鳥鼠至于太華熊耳外方桐柏  
至于陪尾導嶓冢至于荆山內方至于大別岷山  
之陽至于衡山過九江至于敷淺原導弱水至于  
合黎餘波入于流沙導黑水至于三危入于南海  
導河積石至于龍門南至于華陰東至于底柱又  
東至于孟津東過洛汭至于大伾北過降水至于  
大陸又北播爲九河同爲逆河入于海嶓冢導漾

東流爲漢又東爲滄浪之水過三澨至于大別南  
入于江東匯澤爲彭蠡東爲北江入于海岷山導  
江東別爲沱又東至于澧過九江至于東陵東迤  
北會于匯東爲中江入于海導沅水東流爲濟入  
于河溢爲滎東出于陶丘北又東至于荷又東北  
會于汶又北東入于海導淮自桐柏東會于泗沂  
東入于海導渭自鳥鼠同穴東會于澧又東會于  
涇又東過漆沮入于河導洛自熊耳東北會于澗

灋又東會于伊又東北入于河九州攸同四隩旣  
宅九山刊旅九川滌源九澤旣陂四海會同六府  
孔修庶土交正底慎財賦咸則三壤成賦中邦錫  
土姓祗台德先不距朕行五百里甸服百里賦納  
總二百里納銍三百里納秸服四百里粟五百里  
米五百里侯服百里采二百里男邦三百里諸侯  
五百里綏服三百里揆文教二百里奮武衛五百  
里要服三百里夷二百里蔡五百里荒服三百里

蠻二百里流東漸于海西被于流沙朔南暨聲教  
訖于四海禹錫玄圭告厥成功百里書為誓五百  
甘誓第二 對距百里宋二百里夏書

啓與有扈戰于甘之野作甘誓 甘誓 孔氏傳

大戰于甘乃召六卿王曰嗟六事之人予誓告汝  
有扈氏威侮五行怠弃三正天用勦絕其命今予  
惟恭行天之罰左不攻于左汝不恭命右不攻于

右汝不恭命御非其馬之正汝不恭命用命賞于  
祖弗用命戮于社予則孥戮汝 夏書

五子之歌第三 孔氏傳  
太康失邦昆弟五人須于洛汭作五子之歌 五  
子之歌 本固 天不愚夫

太康尸位以逸豫滅厥德黎民咸貳乃盤遊無度  
畋于有洛之表十旬弗反有窮后羿因民弗忍距

于河厥弟五人御其母以從篚于洛之汭五子咸  
 怨述大禹之戒以作歌其一曰皇祖有訓民可近  
 不可下民惟邦本本固邦寧予視天下愚夫愚婦  
 一能勝予一人三失怨豈在明不見是圖予臨兆  
 民懷乎若朽索之馭六馬為人上者奈何不敬其  
 二曰訓有之內作色荒外作禽荒甘酒嗜音峻宇  
 雕牆有一于此未或不亡其三曰惟彼陶唐有此  
 冀方今失厥道亂其紀綱乃底滅亡其四曰明明

我祖萬邦之君有典有則貽厥子孫關石和鈞王  
 府則有荒墜厥緒覆宗絕祀其五曰嗚呼曷歸予  
 懷之悲萬姓仇予予將疇依鬱陶乎予心顏厚有  
 忸怩弗慎厥德雖悔可追

夏書

孔氏傳


胤征第四  
 義和湏淫廢時亂日胤往征之作胤征胤征  
 惟仲康肇位四海胤侯命掌六師義和廢厥職酒

尚書卷三  
荒于厥邑胤后承王命徂征告于衆曰嗟予有衆  
聖有謨訓明徵定保先王克謹天戒臣人克有常  
憲百官修輔厥后惟明明每歲孟春適人以木鐸  
徇于路官師相規工執藝事以諫其或不恭邦有  
常刑惟時義和顛覆厥德沈亂于酒畔官離次倣  
擾天紀遐弃厥司乃季秋月朔辰弗集于房瞽奏  
鼓嗇夫馳庶人走義和尸厥官罔聞知昏迷于天  
象以干先王之誅政典曰先時者殺無赦不及時

者殺無赦今予以爾有衆奉將天罰爾衆士同力  
王室尚弼予欽承天子威命火炎崐岡玉石俱焚  
天吏逸德烈于猛火殲厥渠魁脅從罔治舊染汙  
俗咸與惟新嗚呼威克厥愛允濟愛克厥威允罔  
功其爾衆士懋戒哉自契至于成湯八遷湯始居  
亳從先王居作帝告釐沃湯征諸侯葛伯不祀湯  
始征之作湯征伊尹去亳適夏既醜有夏復歸于  
亳入自北門乃遇汝鳩汝方作汝鳩汝方



尚書卷第三



尚書卷第四

湯誓第一

商書

孔氏傳

伊尹相湯伐桀升自陬遂與桀戰于鳴條之野作

湯誓

王曰格爾眾庶悉聽朕言非台小子敢行稱亂有夏多罪天命殛之今爾有眾汝曰我后不恤我眾

尚書卷四  
一  
舍我穡事而割正夏予惟聞汝衆言夏氏有罪予  
畏上帝不敢不正今汝其曰夏罪其如台夏王率  
遏衆力率割夏邑有衆率怠弗協曰時日曷喪予  
及汝皆亡夏德若茲今朕必往爾尚輔予一人致  
天之罰予其大賚汝爾無不信朕不食言爾不從  
誓言予則孥戮汝罔有攸赦湯既勝夏欲遷其社  
不可作夏社疑至臣扈夏師敗績湯遂從之遂伐  
三朮俘厥寶玉誼伯仲伯作典寶

仲虺之誥第二

商書

孔氏傳

湯歸自夏至于大坰仲虺作誥 仲虺之誥  
成湯放桀于南巢惟有慙德曰予恐來世以台爲口  
實仲虺乃作誥曰嗚呼惟天生民有欲無主乃亂  
惟天生聰明時又有夏昏德民墜塗炭天乃錫王勇  
智表正萬邦纘禹舊服茲率厥典奉若天命夏王  
有罪矯誣上天以布命于下帝用不臧式商受命

用爽厥師簡賢附勢寔繁有徒肇我邦于有夏若  
苗之有莠若粟之有秕小大戰戰固不懼于非辜  
矧予之德言足聽聞惟王不邇聲色不殖貨利德  
懋懋官功懋懋賞用人惟己改過不吝克寬克仁  
彰信兆民乃葛伯仇餉初征自葛東征西夷怨南  
征北狄怨曰奚獨後予攸徂之民室家相慶曰後  
予后後來其蘇民之戴商厥惟舊哉佑賢輔德顯  
忠遂良兼弱攻昧取亂侮亡推亡固存邦乃其昌

德日新萬邦惟懷志自滿九族乃離王懋昭大德  
建中于民以義制事以禮制心垂裕後昆予聞曰  
能自得師者王謂人莫己若者亡好問則裕自用  
則小嗚呼慎厥終惟其始殖有禮覆昏暴欽崇天  
道永保天命

湯誥第三

商書

孔氏傳

湯既黜夏命復歸于亳作湯誥

湯誥

尚書卷四  
三  
王歸自克夏至于亳誕告萬方王曰嗟爾萬方有  
衆明聽予一人誥惟皇上帝降衷于下民若有恒  
性克綏厥猷惟后夏王滅德作威以敷虐于爾萬  
方百姓爾萬方百姓罹其凶害弗忍荼毒並告無  
辜于上下神祇天道福善禍淫降災于夏以彰厥  
罪肆台小子將天命明威弗敢赦敢用玄牡敢昭  
告于上天神后請罪有夏聿求元聖與之勳力以  
與爾有衆請命上天孚佑下民罪人黜伏天命弗

僭賁若草木兆民允殖俾予一人輯寧爾邦家茲  
朕未知獲戾于上下慄慄危懼若將隕于深淵凡  
我造邦無從匪彝無即愆淫各守爾典以承天休  
爾有善朕弗敢蔽罪當朕躬弗敢自赦惟簡在上  
帝之心其爾萬方有罪在予一人予一人有罪無  
以爾萬方嗚呼尚克時忱乃亦有終各單作明居  
伊訓第四

商書

孔氏傳

成湯既沒太甲元年伊尹作伊訓肆命徂后 伊

訓

惟元祀十有二月乙丑伊尹祠于先王奉嗣王祗  
見厥祖侯甸羣后咸在百官總己以聽冢宰伊尹  
乃明言烈祖之盛德以訓于王曰嗚呼古有夏先  
后。方。懋。厥。德。罔。有。天。災。山。川。鬼。神。亦。莫。不。寧。暨。鳥。  
獸。魚。鼈。咸。若。于。其。子。孫。弗。率。皇。天。降。災。假。手。于。我。  
有。命。造。攻。自。鳴。條。朕。哉。自。亳。惟。我。商。王。布。昭。聖。武。

代虐以寬兆民允懷今王嗣厥德罔不在初立愛  
惟親立敬惟長始于家邦終于四海嗚呼先王肇  
修人紀從諫弗咈先民時若居上克明爲下克忠  
與人不求備檢身若不及以至于有萬邦茲惟艱  
哉敷求哲人俾輔于爾後嗣制官刑儆于有位曰  
敢有恒舞于宮酣歌于室時謂巫風敢有殉于貨  
色恒于遊畋時謂淫風敢有侮聖言逆忠直遠者  
德比頑童時謂亂風惟茲三風十愆卿士有一于

身家必喪邦君有一于身國必亡臣下不匡其刑  
墨具訓于蒙士嗚呼嗣王祗厥身念哉聖謨洋洋  
嘉言孔彰惟上帝不常作善降之百祥作不善降  
之百殃爾惟德罔小萬邦惟慶爾惟不德罔大墜  
厥宗肆命徂后

太甲上第五

商書

孔氏傳

太甲既立不明伊尹放諸桐三年復歸于亳思庸

伊尹作太甲

惟嗣王不惠于阿衡伊尹作書曰先王顧諟天之  
明命以承上下神祇社稷宗廟罔不祇肅天監厥  
德用集大命撫綏萬方惟尹躬克左右厥辟宅師  
肆嗣王丕承基緒惟尹躬先見于西邑夏自周有  
終相亦惟終其後嗣王罔克有終相亦罔終嗣王  
戒哉祗爾厥辟辟不辟忝厥祖王惟庸罔念聞伊  
尹乃言曰先王昧爽丕顯坐以待旦旁求俊彥啓

尚書卷四  
迪後人無越厥命以自覆慎乃儉德惟懷永圖若  
虞機張往省括于度則釋欽厥止率乃祖攸行惟  
朕以懌萬世有辭王未克變伊尹曰茲乃不義習  
與性成予弗狎于弗順營于桐宮密邇先王其訓  
無俾世迷王徂桐宮居憂克終允德

太甲中第六

商書

孔氏傳

惟三祀十有二月朔伊尹以冕服奉嗣王歸于亳

作書曰民非后罔克昏匡以生后非民罔以辟四方皇天眷佑有商俾嗣王克終厥德實萬世無疆之休王拜手稽首曰予小子不明于德自底不類欲敗度縱敗禮以速戾于厥躬天作孽猶可違自作孽不可逭既往背師保之訓弗克于厥初尚賴匡救之德圖惟厥終伊尹拜手稽首曰修厥身允德協于下惟明后先王子惠困窮民服厥命罔有不悅並其有邦厥鄰乃曰徯我后后來無罰王懋

乃德視乃厥祖無時豫怠奉先思孝接下思恭視遠惟明聽德惟聰朕承王之休無斁

太甲下第七

商書

孔氏傳

伊尹申誥于王曰嗚呼惟天無親克敬惟親民罔常懷懷于有仁鬼神無常享享于克誠天位艱哉德惟治否德亂與治同道罔不興與亂同事罔不亡終始慎厥與惟明明先王惟時懋敬厥德克配

上帝今王嗣有令緒尚監茲哉若升高必自下若陟遐必自邇無輕民事惟難無安厥位惟危慎終于始有言逆于汝心必求諸道有言遜于汝志必求諸非道嗚呼弗慮胡獲弗為胡成一元良萬邦以貞君罔以辯言亂舊政臣罔以寵利居成功邦其永孚于休

咸有一德第八

商書

孔氏傳



尚書卷四  
伊尹作成有一德 咸有一德

伊尹既復政厥辟將告歸乃陳戒于德曰嗚呼天難謀命靡常常厥德保厥位厥德匪常九有以亡夏王弗克庸德慢神虐民皇天弗保監于萬方啓迪有命眷求一德俾作神主惟尹躬暨湯咸有一德克享天心受天明命以有九有之師爰革夏正非天私我有商惟天佑于一德非商求于下民惟民歸于一德德惟一動罔不吉德二三動罔不凶

惟吉凶不僭在人惟天降災祥在德今嗣王新服厥命惟新厥德終始惟一時乃日新任官惟賢材左右惟其人臣爲上爲德爲下爲民其難其慎惟和惟一德無常師主善爲師善無常主協于克一俾萬姓咸曰大哉王言又曰一哉王心克綏先王之祿永底烝民之生嗚呼七世之廟可以觀德萬夫之長可以觀政后非民罔使民非后罔事無自廣以狹人匹夫匹婦不獲自盡民主罔與成厥功

沃丁既葬伊尹于亳咎單遂訓伊尹事作沃丁伊  
陟相太戊亳有祥桑穀共生于朝伊陟贊于巫咸  
作成又四篇太戊贊于伊陟作伊陟原命仲丁遷  
于囂作仲丁河亶甲居相作河亶甲祖乙圮于耿  
作祖乙

尚書卷第四

尚書卷第五

盤庚上第九

商書

孔氏傳

盤庚五遷將治亳殷民咨胥怨作盤庚三篇 盤  
庚

盤庚遷于殷民不適有居率籲眾感出矢言曰我  
王來既爰宅于茲重我民無盡劉不能胥匡以生

卜稽曰其如台先王有服恪謹天命茲猶不常寧  
不常厥邑于今五邦今不承于古罔知天之斷命  
矧曰其克從先王之烈若顛木之有由蘖天其永  
我命于茲新邑紹復先王之業底綏四方盤庚  
敷于民曰由乃在位以常舊服正法度曰無或敢  
伏小人之攸箴王命衆悉至于庭王若曰格汝衆  
予告汝訓汝猷黜乃心無傲從康古我先王亦惟  
圖任舊人共政王播告之修不匿厥指王用丕欽

罔有逸言民用丕變今汝聒聒起信儉膚予弗知  
乃所訟非予自荒茲德惟汝舍德不惕予一人予  
若觀火予亦拙謀作乃逸若網在綱有條而不紊  
若農服田力穡乃亦有秋汝克黜乃心施實德于  
民至于婚友丕乃敢大言汝有積德乃不畏戎毒  
于遠邇愔農自安不昏作勞不服田畝越其罔有  
黍稷汝不和吉言于百姓惟汝自生毒乃敗禍姦  
宄以自災于厥身乃既先惡于民乃奉其恫汝悔

身何及相時儉民猶胥顧于箴言其發有逸口矧  
予制乃短長之命汝曷弗告朕而胥動以浮言恐  
沈于眾若火之燎于原不可嚮邇其猶可撲滅則  
惟汝眾自作弗靖非予有咎遲任有言曰人惟求  
舊器非求舊惟新古我先王暨乃祖乃父胥及逸  
勤予敢動用非罰世選爾勞予不掩爾善茲予大  
享于先王爾祖其從與享之作福作災予亦不敢動  
用非德予亦告汝于難若射之有志汝無老侮成

人無弱孤有幼各長于厥居勉出乃力聽予一人  
之作猷無有遠邇用罪伐厥死用德彰厥善邦之  
臧惟汝眾邦之不臧惟予一人有佚罰凡爾眾其  
惟致告自今至于後日各恭爾事齊乃位度乃口  
罰及爾身弗可悔

盤庚中第十

商書

孔氏傳

盤庚作惟涉河以民遷乃話民之弗率誕告用亶

其有衆咸造勿褻在王庭盤庚乃登進厥民曰明  
聽朕言無荒失朕命嗚呼古我前后罔不惟民之  
承保后昏感鮮以不浮于天時殷降大虐先王不  
懷厥攸作視民利用遷汝曷弗念我古后之聞承  
汝俾汝惟喜康共非汝有咎比于罰予若籲懷茲  
新邑亦惟汝故以丕從厥志今予將試以汝遷安  
定厥邦汝不憂朕心之攸困乃咸大不宣乃心欽  
念以忱動予一人爾惟自鞠自苦若乘舟汝弗濟

臭厥載爾忱不屬惟昏以沈不其或稽自怒曷瘳  
汝不謀長以思乃災汝誕勸憂今其有今罔後汝  
何生在上今予命汝一無起穢以自臭恐人倚乃  
身迂乃心予迂續乃命于天子豈汝威用奉畜汝  
衆予念我先神后之勞爾先予丕克羞爾用懷爾  
然失于政陳于茲高后丕乃崇降罪疾曰曷虐朕  
民汝萬民乃不生生暨予一人猷同心先后丕降  
與汝罪疾曰曷不暨朕幼孫有比故有爽德自上

其罰汝汝罔能迪古我先后既勞乃祖乃父汝共  
作我畜民汝有戕則在乃心我先后綏乃祖乃父  
乃祖乃父乃斷弃汝不救乃死茲予有亂政同位  
具乃貝玉乃祖乃父丕乃告我高后曰作丕刑于  
朕子孫迪高后丕乃崇降弗祥嗚呼今予告汝不  
易永敬大恤無胥絕遠汝分猷念以相從各設中  
干乃心乃有不吉不迪顛越不恭暫遇姦宄我乃  
劓殄滅之無遺育無俾易種于茲新邑往哉生生

今予將試以汝遷永建乃家

盤庚下第十一

商書

孔氏傳

盤庚既遷奠厥攸居乃正厥位綏爰有衆曰無戲  
怠懋建大命今予其敷心腹腎腸歷告爾百姓于  
朕志罔罪爾衆爾無共怒協比讒言予一人古我  
先王將多于前功適于山用降我凶德嘉績于朕  
邦今我民用蕩析離居罔有定極爾謂朕曷震動

萬民以遷肆上帝將復我高祖之德亂越我家朕  
及篤敬恭承民命用永地于新邑肆予冲人非廢  
厥謀弔由靈各非敢違卜用宏茲賁嗚呼邦伯師  
長百執事之人尚皆隱哉予其懋簡相爾念敬我  
衆朕不肩好貨敢恭生生鞠人謀人之保居敘欽  
今我既羞告爾于朕志若否罔有弗欽無總于貨  
寶生生自庸式敷民德永肩一心

說命上第十二

商書

孔氏傳

高宗夢得說使百工營求諸野得諸傅巖作說命  
三篇 說命

王宅憂亮陰三祀既免喪其惟弗言羣臣咸諫于  
王曰嗚呼知之曰明哲明哲實作則天子惟君萬  
邦百官承式王言惟作命不言臣下罔攸稟今王  
庸作書以誥曰以台正于四方台恐德弗類茲故  
弗言恭默思道夢帝賚予良弼其代予言乃審厥

尚書卷五  
象。俾。以。形。旁。求。于。天。下。說。築。傅。巖。之。野。惟。肖。爰。立。  
作。相。王。置。諸。其。左。右。命。之。曰。朝。夕。納。誨。以。輔。台。德。  
若。金。用。汝。作。礪。若。濟。巨。川。用。汝。作。舟。楫。若。歲。大。旱。  
用。汝。作。霖。雨。啓。乃。心。沃。朕。心。若。藥。弗。瞑。眩。厥。  
疾。弗。瘳。若。跣。弗。視。地。厥。足。用。傷。惟。暨。乃。僚。罔。不。同。  
心。以。匡。乃。辟。俾。率。先。王。迪。我。高。后。以。康。兆。民。嗚。呼。  
欽。予。時。命。其。惟。有。終。說。復。于。王。曰。惟。木。從。繩。則。正。  
后。從。諫。則。聖。后。克。聖。臣。不。命。其。承。疇。敢。不。祗。若。王。

之休命

說命中第十三

商書

孔氏傳

惟說命總百官乃進于王曰嗚呼明王奉若天道  
建邦設都樹后王君公承以大夫師長不惟逸豫  
惟以亂民惟天聰明惟聖時憲惟臣欽若惟民從  
乂惟口起羞惟甲冑起戎惟衣裳在笥惟干戈省  
厥躬王惟戒茲允茲克明乃罔不休惟治亂在庶



尚書卷五  
七  
官官不及私昵惟其能爵罔及惡德惟其賢慮善  
以動動惟厥時有其善喪厥善矜其能喪厥功惟  
事事乃其有備有備無患無啓寵納侮無恥過作  
非惟厥攸居政事惟醇黷于祭祀時謂弗欽禮煩  
則亂事神則難王曰旨哉說乃言惟服乃不良于  
言予罔聞于行說拜稽首曰非知之艱行之惟艱  
王忱不艱允協于先王成德惟說不言有厥咎  
說命下第十四  
尚書

孔氏傳

王曰來汝說台小子舊學于甘盤既乃遜于荒野  
入宅于河自河徂亳暨厥終罔顯爾惟訓于朕志  
若作酒醴爾惟麴蘖若作和羹爾惟鹽梅爾交修  
予罔予弃予惟克邁乃訓說曰王人求多聞時惟  
建事學于古訓乃有獲事不師古以克永世匪說  
攸聞惟學遜志務時敏厥修乃來允懷于茲道積  
于厥躬惟斆學半念終始典于學厥德修罔覺監

于先王成憲其永無愆惟說式克欽承旁招俊乂  
列于庶位王曰嗚呼說四海之內咸仰朕德時乃  
風股肱惟人良臣惟聖昔先正保衡作我先王乃  
曰予弗克俾厥后惟堯舜其心愧恥若撻于市一  
夫不獲則曰時予之辜佑我烈祖格于皇天爾尚  
明保予罔俾阿衡專美有商惟后非賢不乂惟賢  
非后不食其爾克紹乃辟于先王永綏民說拜稽  
首曰敢對揚天子休命

高宗彤日第十五

商書

孔氏傳

高宗祭成湯有飛雉升鼎耳而雉祖己訓諸王作

高宗彤日高宗之訓 高宗彤日

高宗彤日越有雉雉祖己曰惟先格王正厥事乃  
訓于王曰惟天監下民典厥義降年有永有不永  
非天夭民民中絕命民有不若德不聽罪天既孚  
命正厥德乃曰其如台嗚呼王司敬民罔非天胤

典祀無豐于昵

西伯戡黎第十六

商書

孔氏傳

殷始咎周周人乘黎祖伊恐奔告于受作西伯戡黎

西伯既戡黎祖伊恐奔告于王曰天子天既訖我殷命格人元龜罔敢知吉非先王不相我後人惟王淫戲用自絕故天弃我不有康食不虞天性不

迪率典今我民罔弗欲喪曰天曷不降威大命胡不摯今王其如台王曰嗚呼我生不有命在天祖伊反曰嗚呼乃罪多參在上乃能責命于天殷之即喪指乃功不無戮于爾邦

微子第十七

商書



孔氏傳

殷既錯天命微子作誥父師少師微子微子若曰父師少師殷其弗或亂正四方我祖底

尚書卷五  
遂陳于上用沈酗于酒用亂敗厥德于下殷罔  
不小大好草竊姦宄卿士師師非度凡有辜罪乃  
罔恒獲小民方興相爲敵讎今殷其淪喪若涉大  
水其無津涯殷遂喪越至于今日父師少師我其  
發出狂吾家老遜于荒今爾無指告予顛濟若之  
何其父師若曰王子天毒降災荒殷邦方興沈酗  
于酒乃罔畏畏咈其耆長舊有位人今殷民乃攘  
竊神祇之犧牲牲用以容將食無災降監殷民用

又讎斂召敵讎不怠罪合于一多瘠罔詔商今其  
有災我興受其敗商其淪喪我罔爲臣僕詔王子  
出迪我舊云刻子王子弗出我乃顛濟自靖人自  
獻于先王我不顧行遜

尚書卷第五



尚書卷五

十一

